

## Álit Vísindanefndar opinberra háskóla


Í janúar 2007 úrskurðaði kjararáð, sem starfar samkvæmt lögum nr. 47/2006, að ákvörðun launa og starfskjara prófessora skyldi ekki lengur heyra undir ráðið. Í kjölfarið fól fjármálaráðuneytið vísindasviði Háskóla Íslands að annast tímabundið umsjón með mati á verkum prófessora í ríkisháskólum og reikna út ritlaun og hækkun á milli launaflokka. Ákvörðun þessi var staðfest í samkomulagi prófessora í ríkisháskólum og fjármálaráðherra frá 26. september 2008. Með framangreindu samkomulagi var jafnframt skipuð nefnd sem falið var að útfæra framtíðarskipan verklags við mat á störfum prófessora. Nefnd þessa skipuðu fulltrúar samningsaðilanna (fjármálaráðuneytis og Félags prófessora) og fjórir aðrir fulltrúar: einn samkvæmt tilnefningu frá Háskóla Íslands, einn fulltrúi annarra opinberra háskóla, einn fulltrúi mennta- og menningarmálaráðuneytis og einn fulltrúi án tilnefningar sem var oddamaður. Nefnd þessi komst að samkomulagi um fyrirkomulag við mat á störfum akademískra starfsmanna í ríkisháskólunum hinn 6. nóvember sl.

Með framangreindu fyrirkomulagi er sett á laggirnar **Vísindanefnd opinberra háskóla** sem ætlað er að þróa matskerfi fyrir háskólana í samráði við Félag prófessora og önnur kjarafélög sem kerfið tekur til. Vísindanefnd opinberra háskóla skipa fjórir fulltrúar Háskóla Íslands, þau Ástráður Eysteinnsson prófessor, Gunnlaugur Björnsson vísindamaður, Helga M. Ögmundsdóttir prófessor og Sigrún Aðalbjarnardóttir prófessor, auk eins fulltrúa annarra opinberra háskóla sem er Áslaug Helgadóttir prófessor.

Samkvæmt samkomulaginu gerir Vísindanefnd opinberra háskóla tillögu um breytingar á matskerfinu til svokallaðrar **Matskerfisnefndar** sem staðfestir kerfið fyrir hönd þeirra sem að samkomulaginu standa. Í Matskerfisnefnd sitja fjórir fulltrúar: einn frá fjármálaráðuneyti, Sverrir Jónsson sérfræðingur, einn frá mennta- og menningarmálaráðuneyti, Eiríkur Smári Sigurðsson sérfræðingur, einn frá Háskóla Íslands, Jón Atli Benediktsson aðstoðarrektror og einn frá öðrum opinberum háskólum, Stefán B. Sigurðsson rektor.

Á háskólaþingi Háskóla Íslands hinn 15. maí sl. var til umræðu tillaga að endurskoðuðu matskerfi fyrir Háskóla Íslands sem vísindanefnd háskólaráðs hafði unnið að um alllangt skeið. Á fundinum var enn fremur kynnt greinargerð um framkomnar athugasemdir við tillöguna frá fræðasviðum Háskólans, deildum og kjarafélögum kennara auk athugasemda frá Háskólanum á Akureyri. Í kjölfar ítarlegrar umræðu samþykkti háskólaþingið að fela forsetum fræðasviða og rektor að leiða málið til lykta á grundvelli tillögu vísindanefndar og þeirra athugasemda sem fram höfðu komið. Ljúka skyldi endurskoðun kerfisins fyrir árslok 2009. Þann 5. nóvember sl. samþykkti háskólaráð Háskóla Íslands endurskoðaða tillögu að breyttu matskerfi fyrir sitt leyti.

Vísindanefnd opinberra háskóla hefur borist tillaga háskólaráðs Háskóla Íslands. Í ljósi þess hversu skammur tími er til stefnu getur nefndin ekki gert efnislegar breytingar á tillögunni eins og hún liggur fyrir, enda telur nefndin að tillagan sé að sumu leyti til bóta frá núgildandi matskerfi. Vísindanefndinni er kunnugt um að skiptar skoðanir eru um þessa tillögu meðal háskólafélks og á það einnig við um nefndina. Efnisleg endurskoðun reglnanna hefst strax á næsta ári og mun nefndin kalla eftir athugasemdum frá öllum sem málið varðar. Jafnframt mun hún skoða sérstaklega hvernig matskerfið reynist í samanburði við það sem nú gildir. Við endurskoðun reglnanna mun nefndin leggja megináherslu á gæði með alþjóðleg viðmið að leiðarljósi.





Handwritten signatures and initials in the right margin, including what appears to be 'AB', 'Al', 'Key', and 'AA'.


Skýrt verði að reglurnar taki til mats á störfum akademískra starfsmanna við fjóra opinbera háskóla: Háskóla Íslands, Háskólann á Akureyri, Landbúnaðarháskóla Íslands og Hólaskóla – Háskólann á Hólum.


Vísindanefnd opinberra háskóla leggur áherslu á að ákvæði um sérstakt mat verði virkara en verið hefur og framkvæmt með gagnvirkum hætti. Slíkt jafningjamat annist viðurkenndir sérfræðingar sem standi utan hefðbundinna matsnefnda vegna vinnumats.

Reykjavík, 18. desember 2009

  
Aslaug Helgadóttir

  
Gunnlaugur Björnsson

  
Ástráður Eysteinsson

  
Helga M. Ögmundsdóttir

  
Sigrún Aðalbjarnardóttir